

滇

繫

滇繫書目

趙州師
範荔扉纂輯

人物一冊全

漢

晉

唐

宋

元

明

卷一

國朝

詞館

省元

附

試差學差同考紀

選舉考

學校考

大略一覽全

欽定四庫全書

滇繫

人物繫

趙州師

範荔扉纂輯

漢盛覽字長通樸榆人也學於司馬相如所著有賦心四卷嘗問相如以作賦相如答曰合纂組以成文列錦繡而爲質一經一緯一宮一商此賦之迹也賦家之心包括宇宙總覽人物斯乃得之於內不可得而傳覽乃作合組歌列錦賦而退終身不復言賦同時有張叔者天姿穎出過目成誦俗不知書叔每疾之思變其俗元狩間聞相如至若水造梁距樸榆二百餘里親負笈往從之受經歸以教鄉人

隗叔通若水人也性至孝母好飲江水叔通日入江取水以給
冬夏天爲出平石至江中人謂之孝子石見酈道元水經注
許叔善閬人也章帝元和中入中國從師受五經歸教郡人
尹珍字道直牂牁人桓帝時自以生於荒裔不知禮義乃
從汝南許慎應奉受經書圖緯學成還鄉里教授於是南域始
爲學焉官至荊州刺史

爨習建甯郡人丞相亮平南中收其俊傑爲官屬習官至領軍
時朱提孟琰者亦以材見收用官至輔漢將軍

阿南者酋長曼阿奴之妻也夫爲漢將郭世忠所殺欲妻之贈

以衣飾阿南恐逼已結之曰妾欲從君君能從我三事乎曰從
一須作幕次祭故夫二須焚故夫衣易新衣三須令國人徧知
禮嫁明日如其言聚人張松幕置火其下阿南抽刀出令火熾
盛乃焚衣告曰妾忍以身事讐乎遂引刀自斷身赴火中時六
月二十五日也國人哀之每歲以是日焚炬聚會以弔之後人
名爲星回節

晉龐遺樸榆人也成帝咸和二年蜀賊李雄攻建甯時遺爲秀
才起義攻雄大破之雄遁走

謝恕字茂理牂牁母歛人咸和八年甯州爲李雄所破南中盡

爲雄有惟恕保郡獨爲晉官至撫夷中郎將賓州刺史

傅寶字紀圖平夷人仕爲尚書郎長安令時號南州人傑

唐段赤城樸榆人有膽畧勇於爲義蒙詔時龍尾關外有大蟒
吞陷人畜衆苦之赤城披甲持雙刀赴蟒蟒吞之刃出於背蟒
亦死土人剖蟒腹出赤城骨葬之建塔冢上煅蟒骨以聖塔

楊興永昌人蒙氏時爲布燮天寶八載率所部入附天子下璽
書褒美旌其門子孫世爲永昌酋長

張志誠善聞人憲宗元和中游成都學書得二王帖寶惜之日
臨數過及歸從學書者甚衆

王仁求安甯人爲河東州刺史教民以生聚阜財之道賦役均平恩義兼濟人心咸服夷風丕變子善寶以雲麾將軍持節河東諸軍事亦有治蹟

閉珊居集者霑益州烏蠻也精卜筮之學其法用細竹四十九枚以代蓍草或以雞骨爲之占算如神夷中稱爲筮師

阿呵者馬龍州人納垢酋之後也棄官職隱山谷中撰爨字字如科斗二年始成字母一千八百四十有奇名曰隄書爨人至今習之爲書祖云

楊奇鯤樸榆人也讀書貫穿百家尤長聲詩唐詩載其一首云

風裏浪花吹又白雨中嵐影洗還青江鷗聚處窗前見林狖啼
時枕上聽

慈善者唐鄧暎詔妻也開元中南詔旣強有併吞五詔之心六
月二十五日星回節南詔召五詔燕會慈善逆知其謀止夫無
往夫曰勢不可已婦乃作鐵釧約其臂而去旣而南詔果焚五
詔皆爲灰燼佯曰五詔醉失火焚死各詔骸骨無從辨認獨慈
善輿夫屍而去南詔聞其哲欲娶之慈善閉城自固南詔發兵
圍之三月食盡乃盛衣粧西向自縛於座竟以餓死臨卒曰吾
往訴夫寃於上帝南詔聞之悔曰悞逼此貞節婦乃旌其城曰

德源城

太和皇帝勝南詔臣也師子國王伐緬緬求救於南詔遣宗勝將兵救之時詔老子世隆幼權臣楊苴顛熾盛宗勝恐其篡奪乃請曰今臣救緬若權不重人不用命必專生殺方可許之遂出令限七日齊軍於河尾惟統矢違限遂斬其將乃苴顛子也既入緬得勝獲師子國旗幟金鼓兵仗而還緬王酬以金寶不取取佛舍利至騰越聞詔卒苴顛果篡立宗勝與苴顛書云王崩子幼聞公攝位國家之福也曩承詔旨率師救緬師子國不戰而潰緬王酬我佛舍利今凱還倘率國中多人迎舍利境上榮

演藝
甚直顛得書率國中耆艾服龍衣手執金爐盛陳儀衛至義修
相見宗勝云先拜舍利直顛下拜宗勝斬之歸求世隆立焉
宋高量成段氏相也避位不仕築城於威楚之德江村優恤孤
寡教誨子弟風俗翕然丕變稱爲夷中君子

李紫琮大理人以其主段和譽命爲進奉使入貢於宋過湖南
聞學校文物之盛請於押伴求詣學瞻拜宣聖像邵州守張察
許之遂往遍謁見諸生又乞觀御書閣舉笏叩首

元高泰祥者南詔段氏相也世祖率衆二十萬來攻泰祥以死
拒戰衆寡不敵走姚州募兵勤王復戰兵敗被虜世祖訊之不

屈欲官之嫚罵不受斬於五華樓下臨刑曰段運不回天使其然爲臣死國職也吾事畢矣時烈日當午雷電大作風沙愁慘觀者萬人莫不洒泣元主曰忠臣也命收葬之

陳惠亦段氏臣四川明玉珍紅巾攻善闡梁王奔威楚總管段功救之與紅巾戰間伺得玉珍母書語子成功乃返功更其詞募軍中無人敢持書者惠願往功難之惠曰以吾一命救萬人當不負但老母無養耳功曰迎爾母宮吾宮膳吾膳爾無顧也惠遂持書往玉珍得書默然揮之出飯惠詣功言狀功下令曰紅巾今夜必回使人偵之果然追至七星關大破之欲官惠惠

不受

王昇字彥高昆明人資稟聰敏官至宣慰副使以文章政事名於南詔中州文士宦滇者咸與交遊焉同里張景雲亦以理學文章顯景雲字天祥官登仕郎

楊昇太和人性質超邁儒吏無不通至正中以討明玉珍功官拜本路同知卒子寶爲姚安路判官從征克蔚州曹州遷大理路至正中梁王段氏構兵寶曰兩兵相鬪民有供餉鋒鏑之苦極了解和土人深感其德

董文彥通海人任威楚路知事中慶路鎮將敗狐叛引兵攻威

楚官吏皆走文彥獨不去賊欲降之文彥怒曰汝食君之祿不思報恩逆天殄民滅棄綱常恨不能殺汝乃從汝反耶賊怒梏之文彥罵不絕口截其耳使啗焉文彥嚼血噴賊遂遇害明年敗狐伏誅事聞賜謚莊愍官其子時中爲祿豐主簿

楊淵海南詔臣事段功功有寵於梁王淵海出語人曰吾主與我無生還日矣人恠之曰主自怙寵於君何預淵海曰豈有食人之食而不同其難者明年功果爲梁王所害淵海死之

楊惠楚雄人父蚤喪事母劉氏盡孝母遭疾幾危惠不櫛髮不解帶者月餘禱神求以身代劉氏夜夢神告之曰爾壽當終爲

爾子孝誠所感今特延之次日果瘳壽至八十五卒惠負土營墳廬於傍者三年哀毀喪明有司以聞旌其門蠲其徭役同時昆明則楊立義臨安則張友直董茂春河陽則段文瑞姚州則趙和皆以至孝著稱朝廷旌之

麥宗者通安州麼些人也生七歲不學而識文字偶入玉龍山中見盎中水飲之遂知禽鳥語一日羣鴉在林有一鴉從南來哀鳴甚急羣鴉從之宗曰此雄鴉爲白沙里人所弋迹之果然長而百蠻諸夷之書無不通曉善闡國稱爲異人焉

楊保楊名太和人皆段氏臣洪武十五年明兵入大理保遣弟

名往探緩急約以翌日日出爲期名過期不至有頃聞國破遂自縊死名至亦解弓弦自縊國人義之合葬於宏圭山

阿禱者梁王女也梁爲紅巾所攻平章段功救之梁王德功以女妻焉旣頗猜忍欲鴆之禱知其謀以告功不信遂遇害禱悲憤作詩自悼不食而死時功女羌奴方幼聞變手繡一旗爲志誓復父讐及嫁以畀其弟寶

明吳孝先嶠峨人也幼名虎兒洪武間方十歲隨父出遊父偶爲虎所攫孝先皇遽間取父所佩刀斫虎腰應手而斃父得生還人咸異之一時稱爲孝童

丁嵩永昌人有至性自少至壯動無違禮開館教里中子弟從者如雲洪熙中舉懷才抱德科辭不就徵宣宗卽位下詔求直言嵩陳首務八策一曰正心術則天道應二曰重經筵則宗社福三曰開言路則聞見定四曰用賢才則政治美五曰總大綱則庶務舉六曰汰冗兵則軍儲足七曰重守令則邦本甯八曰崇節儉則財用足上嘉納詔所司強起之至中道卒所著有橫峯樵唱

李純昆明人少不羈有智畧正統間舉孝廉爲監察御史按遼東時土木之變純曰胡虜以我兵勤王而西必出吾不意乃選